


txoritxoari mokoka

Amagoia Iban

Udaberriko beroaldia edo

Udaberriagatik izango da, agian, eta voyeur samarrak garelako ere bai, baina herenegun gauean berotu egin ginen *El tercer grado* ikusten. Zer egingo genuen, bada, futbolaren eta Eurovisionen koktelak erdi akabatuta utzi gintuenean Els Joglars antzerki taldeko Albert Boadella eta Carlos Davila ahozko sexu ariketa ezin agerikoagoan ikustean? Aspalditik ezagutzen dizkiogun jarrerak erakutsi zituen Boadellak, eta Davila lerdea zeriola. Inoiz ez bezala ikusi genuen aurkezle itaunketa zalea, begirada



LLUIS GENE / EFE
Albert Boadella antzerkilaria.

lauso eta sudur zuloak dar-darka, bolaluma eskuan estu lotzen. Izotz puska bat ere urteko modukoa! Espainiarrak ez beste nazionalismoak barregarri utzi, Francok ere bere alde ona izango zuela nabarmendu, Aznarren etorrera ezkerreko bozeramaileek esan zuten bezain txarra ez dela inolaz ere gertatu haizatu... *in crescendo* zihoran kontua, eta argia itzaltzea erabaki genuen, intimitate piti bat ematearren maitale biei. Telebista ez genuen itzali, noski. Masokak eta voyeurrak izango gara, baina tentelak ez. Eta gauza on guztiak bezala, azkarregi amaitu zen elkarriketa. Gogoarekin geratu ginen. Zigarro bat erre. Zuzenean ohera. Udaberria izango ahal da!

LABURAEAN

Mota guztietako opariak daude Euskadi Gazteko 'Hi bizi haiz hi' irratsaioko enkantean

Peruko Namora herrian bizi diren umeentzat etxeak hornitzeko dirua bilduko dute maiatzaren 30ean *Hi bizi haiz hi* irratsaioko enkantean. Hilabete honetako opariaren artean, Aitor Osa txirrindulariaren eta Coloccini futbolariaren elastikoak, Donostiako Aquariumean marrazoekin urpean igeri egiteko aukera eta Barriola eta Beloki pilotariekin entrenatzea izango dira. Hauxe izango da denboraldi honetan Euskadi Gazteak egiten duen azkeneko enkantea.

Japonian Mundialeko partida guztiak emango dituen telebista kateak galera handiak ditu

Sky Perfect Communications telebista enpresak eskainiko ditu Japonian Munduko Futbol Txapelketako 64 lehiak. Antza denez, aurtengo Mundiala ez da espero zena bezain errentagarria izango, eta zor handiak ditu kateak. Iaz 94 milioi dolarreko galerak izan zituela adierazi berri dute, nahiz eta harpidedun kopurua dezente igo den.

Quiero TVtik Canal Satellite Digitalera harpidedunak pasatzeko negoziazioetan dabil

Quiero TV Espainiako lurreko telebista digitaleko plataforma azkenekotan da, eta Canal Satellite Digitalen negoziazioetan da. Akordioaren bitartez Quiero TVko harpidedunak Jesus de Polancoaren plataformara pasako lirake, eta operazioa betez gero Quiero TVk 18 milioi euro jasoko lituzke. Diru horrekin plataformak irauteko aukera gehiago izango lituzke emisioak amaitu arte.

ETB1. Denboraldi berrian aldaketak egon daitezke gaueko tartean



ETB
Xabier Euzkitzer eta Klaudio Landak aurkezten dute *Sorginen Laratza*.

'Sorginen Laratza'-ren inguruan zalantzak

Xabier Euzkitzeren saioak betetzen duen tartean beste produktu batzuk eskain ditzakete

Xabier Martin | DONOSTIA

Euskal Telebistako gaueko tarteak berritasun sakonak izan ditzake datorren denboraldian, EUSKALDUNON EGUNKARIAK jakin ahal izan duenez. Oraindik goiz da programazioak izango dituen aldaketak ziurtasunez zehazteko, baina litekeena da azken hiru denboraldietan pantailan izan den *Sorginen Laratza* saioari dagokionez aldaketa garrantzitsuak egotea.

ETB1eko gaueko tartearen berantolatzearen beharra ikusi dute akaso Euskal Telebistako arduradunek. Izan ere, oraindik erabakiak hartuta ez dauden arren, baliteke astean zehar

hainbat saio *Sorginen Laratza*-ren lekua betetzea.

Euzkitzeren saioak ere bere lekuari eutsiko lioke gauean, baina maiztasunean dago gako. Astelehenetik ostiralera pantailaratu beharrean, astean behin eskaintzeko aukera zabaldu da. Gainerako egunak betetzeko aukera anitz daude: esaterako, Estitxu Fernandezek behin bakarrik aurkeztu duen *Bexamela* saioak indar handia hartu du, saioak arduradunen aurreikuspenak gaintu baitzuten ikus-entzule eta dei kopuruei dagokionez. Julian Iantzik maiztasun zehatzik gabe aurkeztu duen *Begia* gose ere beste aukera bat da astean egun

batez ETB1 katean eskaintzeko.

Bestalde, datorren denboraldiak saio berri bat edo beste ekartzeko aukera ere badago. Itxura guztien arabera, saio berri horrek umorea izango luke ardatz nagusi, eta besteak beste, horrelako aukera betetzeko, jende berria hartzeko frogak hasiak izango lituzke ETBk. Telebisten gaueko eskaintza klasikoari jarraiki, astean behin film bat eskaintzea izan daiteke ETBren beste proposamen bat. Eta azkenik *Sorginen Laratza*-k berak beteko luke ETB1eko aste barruko eskaintza datorren denboraldian.

Euskal Telebistako programazio arduradunek ez dute oraindik behin betiko erabakirik hartu. Hala ere, litekeena da *Sorginen Laratza*-ren zikloa amaitu izana.

ETB



EGUNKARIA
Bingen Zupiria.

Bingen Zupiria: «Telebistak ez du herria salbatuko, entretenimendu tresna bat da»

Erredakzioa | DONOSTIA

ETB1: Hizkuntza, ereduak, audientziak izenburupean euskarazko telebista publikoa aztertu du *Argia*-k Larrun argitalpenean. Mahai-inguruan Edorta Arana, Anjel Lertxundi, Martin Ibarbia eta Bingen Zupiria bildu zituzten. ETBko zuzendari Zupiriak honakoa dio eztabaidaren une batean: «Ez ingo gendake asko urrundu ikusleen gustuetatik, kontuan izan behar dugu zer espero den telebistatik. Niretzat telebista ez da herri hau salbatuko duen tresna bat. Niretzat entretenimendurako tresna bat da. Horren osagarri eguneroko tarte informatiboa dago». Edorta Arana EHUKo irakaslearen arabera, «ETB1 katearen erronka nagusia erreferentzialtasun informatibo kultural eta soziala Euskal Herri guztira zabaltzea litzateke».

Argitalpen berean ETBko albistegietako buru Jaime Otamendi, Eneko Olasagasti zinemagilea eta Josu Amezaga irakaslearen iritzia artikulatuak biltzen dira.